

AWIG – AWIG

DESA ADAT JUMENANG



DESA BUKIT

KECAMATAN KARANGASEM

KABUPATEN KARANGASEM

MURDHA WAKYA

Om Swastyastu

Om Awighnamastu nama sidham

Purwa pangastungkaran tityang Krama Desa Adat Jumenang, ring buk padan Ida Sanghyang Widhi maka sangkan paraning dumadi, Bhatara-Bhatari sane malingga ring Pura Puseh Desa Adat Jumenang, minakadi Pura kahyangan sami sane wenten sajeroning wawengkon Desa Adat Jumenang, dwaning malarapan saking kerta wara nugrahan paduka Bhatara Samudhaya, karya puniki kasidhan puput.

Kaping kalih hatur angayubagian tityang krama Desa Adat Jumenang, pingajeng ring ida dane para Panglingsir, Keliyang, Pamangu, minakadi ida dane sang maraga cestakara, widagdha pradnyan wicaksana sareng sami, sane sampun sangkaning sueca ledang sareng mapawangun ngripta uger-uger marupa Awig-Awig Desa Adat Jumenang puniki, pacang kanggen sepat siku-siku sajeroning desa kantos kaungkur wekas.

Taler majeng ring Pamerintah Kabupaten Karangasem, para manggala sane mastika ngiwang patutang Awig - Awig, tityang ngaturang pangayu bagia, dwaning sampun kasidhan nureksa maritetes saha mastika kantos marupa puput.

Mungguing daging ipun manut Tri Hita Karana, indik kahyangan gemah ngadisthana Ida Sang Hyang Parama Wisesa. Indik pawongan pinaka krama desa, indik palemahan pinaka wawidhangan wawengkon desa, mabantang antuk lekita sastra-gama, sasana, pasuara, dresta, minakadi sane siosan, sane anut ring pamargin dharma agama kalih dharma nagara. Dumadak kasidhan mamanguhang kajagadhitan sakala niskala.

Om Santih Santih Santih Om

NIYASA



1. Swastika : Ngarajegang Agama Hindu
2. Segi Lima : Madasar Pancasila lan Panca Srada
3. Warna dasar Kuning : Nyihnayang satata kejayaan
4. Padi lan Kapas : Gemuh Landuhing Sandang lan Pangan
5. Gunung Kembar : Wenten ring wawidangan Gunung Kembar
Kenusut
6. Padma Kembar : Pamargi Sunia

KATATTWAN DESA

WAWIDANGAN DESA

DAGING AWIG-AWIG DESA ADAT JUMENANG

MURDHA WAKYA	i
NIYASA	ii
KATATTWAN DESA	iii
WAWIDANGAN DESA	iv
DAGING AWIG-AWIG	v
PRATHAMAS SARGAH : ARAN LAN WAWIDANGAN DESA	1
DWITYAS SARGAH : PAMIKUKUH LAN PATITIS TATUJON	1
TRITYAS SARGAH : SUKERTA TATA ADAT	2
Palet 1 : Indik Krama	2
Palet 2 : Indik Tata Praja Desa	4
Palet 3 : Indik Sangkepan lan Paruman	7
Palet 4 : Indik Kulkul	9
Palet 5 : Indik padruean Desa	10
Palet 6 : Indik Laluputan	11
Palet 7 : Indik Dadosan Patedunan	11
Palet 8 : Indik Bhaya	11
Palet 9 : Indik Rarampagan lan Kekeran Desa	12
Palet 10 : Indik Panyanggran Banjar, Krama Desa	13
CATURTAS SARGAH : SUKERTA TATA AGAMA	13
Palet 1 : Indik Dewa Yadnya	13
Kaping 1 : Indik Kahyangan	13
Kaping 2 : Indik Pangaci-aci.....	14
Kaping 3 : Indik Sukertan Pura Kahyangan	15
Kaping 4 : Indik Pamangku	16
Kaping 5 : Indik Cuntaka, miwah Sosot	17
Palet 2 : Indik Resi Yadnya	20
Palet 3 : Indik Pitra Yadnya	20
Palet 4 : Indik Manusa Yadnya	22
Palet 5 : Indik Bhuta Yadnya.....	22

PANCAMAS SARGAH : SUKERTA TATA PALEMAHAN	23
Palet 1 : Indik Tegal, Bangket lan Karang	23
Palet 2 : Indik Kakayonan	25
Palet 3 : Indik Wawangunan	26
Palet 4 : Indik Wawalungan	27
SAT SARGAH : SUKERTA TATA PAWONGAN	28
Palet 1 : Indik Rangkat	28
Palet 2 : Indik Belas Makurenan utawi Nyapian	29
Palet 3 : Indik Balu	29
Palet 4 : Indik Santana	30
Palet 5 : Indik Wawarisan	30
SAPTAMAS SARGAH : WICARA LAN PAMIDANDHA	31
Palet 1 : Indik Wicara	31
Palet 2 : Indik Pamidanda	31
ASTAMAS SARGAH : NGUWAH-NGUWUHIN AWIG-AWIG	32
WAWAMAS SARGAH : PAMUPUT	32

FPRATHAMAS SARGAH
ARAN LAN WAWIDANGAN DESA

Pawos 1

- (1) Desa puniki mawasta Desa Adat Jumenang; salantur ipun kinucap kalih kasuratang sajeroning lekita Desa Adat Jumenang.
- (2) Wawengkon prabumian Desa Adat Jumenang mawaneng nyatur desa manut sakadi kinucap ring sor puniki :
 - ha. Tepi siring Wetan utawi Kangin : Panepi kauh prabumian Desa Adat Seraya;
 - na. Tepi siring Kidul utawi Kelod : Panepi kaler prabumian Desa Adat Bukit;
 - ca. Tepi siring Kulon utawi Kauh : Panepi kangin prabumian Desa Adat Batugunung;
 - ra. Tepi siring Lor utawi Kaler : mawates antuk Pura Lempuyang Luhur;
- (3) Sajeroning wawengkon Desa Adat Jumenang, wantah sinunggal Banjar Adat.

DWITYAS SARGAH
PIKUKUH LAN PATITIS TATUJON

Pawos 2

Maka pikukuh Desa Adat Jumenang, ngarajegang, mikukuhin, kalih mitindihin pisan :

- ha. Pancasila;
- na. Undang-Undang Dasar 1945;
- ca. Tri Hita Karana.
- ra. Peraturan Daerah Provinsi Bali Nomor 4 Tahun 2019, Tentang Desa Adat di Bali

Pawos 3

Desa Adat Jumenang ngamanggehang patitis tatujon, lur ipun :

- ha. Ngutamaang tata-cara maagama Hindu;
- na. Ngawangunang katreptian sajeroning Desa Adat, mangda kasidan rajeg katreptianing praja;
- ca. Ngawerdiang kawicaksanaan minakadi kapradnyanan, maka larapan gumawe gemuh landuhing praja;
- ra. Ngarajegang kalih ngawerdiang padueaning desa, majalaran kawicaksanaan guna laksana manut dharma prawerti;
- ka. Ngarajegang dharma agama miwah dharma nagara.

TRITYAS SARGAH
SUKERTA TATA PAKRAMAN

Palet 1

Indik Krama

Pawos 4

- (1) Sane kasinanggeh krama luire :
- ha. Sang sapasira ugi jenek magenah ring wawengkon Desa Adat Jumenang, lintang ring tigang sasih utawi 105 (satus lima) dina, rajeg meagama Hindu;
 - na. Sang sapasira ugi wed saking Desa Adat Jumenang, jenek magenah ring dura desa, liwaring Desa Adat Jumenang, nanging kantung mipil ring Banjar Adat;
- (2) Papalihan krama, kadi kinucap ring sor puniki :
- ha. Krama Ngarep : Kerama desa sane mulangkep, sane sampun mipil ring Banjar utawi Adat sinalih tunggil sane wenten sajeroning Desa Adat Jumenang utawi mipil ring desa saha mayahan seurah-arih;
 - na. Krama Sasabu : krama sane nenten mipil ring Banjar sakewanten makarang paumahan ring wawengkon desa;
 - ca. Krama teruna krandan : inggih punika krama lanang minakadi istri sane kaselir kabuatang antuk desa, jaga nyanggra saraja karya desa sane kaunadikaang antuk Desa Adat;
 - ra. Krama panyada : krama desa sane sampun tan keni ayahan desa, luire;
 - 1) Sangkaning mapinunas tur sampun kalugra antuk Prajuru Desa;
 - 2) Mabukti sungkan rahat tur tan sida waras;
 - 3) Antuk linggih tan sida maayahan.
 - ka. Krama balu : krama desa lanang wiadin istri sane katinggal seda antuk rabinia utawi sane palas marabian. Wenten balu camput, wenten balu masentana;
 - da. Krama Tamiu : inggih punika krama sane kinucap kadi ring sor puniki;
 - 1) Sang sapa sira ugi wed saking dura desa liwating Desa Adat Jumenang jenek megenah ring wewengkon desa Adat jumenang tan ngawengku karang paumahan madunungan ring pomahaning desa, magenah ring pomahan duem guru wisesa lintang ring tigang sasih utawi 105 (satus lima) dina;
 - 2) Sang sapa sira ugi wed saking liwaring Desa Adat Jumenang makekubon ngenahin palemahan tegal, palasan ring wewengkon Desa Adat Jumenang nanging kari manggeh makrama desa ring kamulan desania, kabuktiang antuk sewalapatra sesinahan saking keliyang desania.
 - ta. Tamiu inggih punika : Sang sapasira ugi magenah ring wawengkon Desa Adat Jumenang, tan sareng sapolikramaning Agama Hindu;

- sa. Tamiu Ngajag : sang sapa sira ugi rauh sajeroning Desa Adat Jumenang nanging tan nekeh magenah irika, patut matur supeksa ring Prajuru Desa, yan tan asapunika, Prajuru Desa wenang nundung jatma inucap mangda matilar saking desa.

Pawos 5

Ngawit tedun makrama desa :

- ha. Sang sapa sira ugi sane wed Desa Adat Jumenang, malarapan antuk, tateragan saha sampun ngamargiang pawiwahan sanistania sampun puput mabiyakaon, tedun makrama desa sasampune pawiwahane mamargi 3 (tigang) sasih;
- na. Krama desa sane mawed kalih jenek ring wewengkon Desa Adat Jumenang mipil ring Desa Adat Jumenang malarapan antuk nyelosin ayahan tuwah kamargiang ritatkala rahina *Anggara Kliwon* nuju Pasangkepan Desa Adat Jumenang;
- ca. Sang sapa sira ugi wed saking dura desa magenah ring wewengkon Desa Adat Jumenang, sampun lintang tigang sasih utawi 105 (satus lima) dina, katerag antuk desa nemonin rahina *anggara kliwon* ritatkala Pasangkepan Desa;
- ra. Sang sapa sira ugi wed saking Desa Adat Jumenang, matilar ka dura desa, wastu malih mawali ka desa Adat Jumenang;
- 1) Yan sangkaning rahayu patilare nguni, wenang mawali mipil ring desa, nganutin kasukertan desa punika patut nyelosin madesa jeroning senger 35 (sasur) dina saking rauhing Desa Adat Jumenang;
 - 2) Yan sangkaning tan rahayu patilare nguni, yogya Bandesa sane ngatengahang babaose ka desa, mangda kabaosang antuk Prajuru Desa. Yan katinutin tatepasan punika, tur kacihnaang antuk maguru piduka ring Pura Puseh Desa Adat Jumenang, prasida kalugra mawali mipil maka krama desa.

Pawos 6

Usan makrama desa, malarapan antuk :

- ha. Seda;
- na. Sangkaning mapinunas ngaraga, ri sampun polih palugrahan Prajuru Desa;
- ca. Tedah utawi tilar saking Agama Hindu;
- ra. kaheladang antuk desa, sangkaning mamurug Awig-Awig, pasuara, kalih pararem desa.

Pawos 7

(1) Swadharmaning krama desa :

- ha. Krama Ngarep, yogya keni payah-ayahan, tata turun cumek, nyanggra saraja karyan desa, manut ungguan soang-soang;
- na. Krama sasabu, yogya ngarombo saraja karyan desa sane kapucukin antuk krama desa ngarep tur kaunadikaang antuk Prajuru Desa;

- ca. Krama Tamiu, yogya ngaturang panaub ka desa, ngamasa-masa, sanangken aci piodalan Ageng ring Pura Puseh Desa Adat Jumenang, minakadi ritatkalaning mapawangun, ngayum wawangunan, panaub gung artha manut pararem;
 - ra. Krama desa ring dura desa, yogya ngaturang panaub ka desa, ngamasa-masa sanangken Ngusaba Kahyangan Tiga, gung artha manut pararem;
 - ka. Krama Sasabu, kaicen karya antuk desa, sane kaunadikaang antuk Prajuru Desa;
 - da. Tamiu tan sareng sapolikramaning agama Hindu, nanging tan wenang piwal ring Awig-Awig, Pasuaran Desa miwah Pamutus Pararem;
 - ta. Sajaba sane mungguh ring ajeng, krama desa samian yogya saturut ring daging Awig-Awig Desa;
- (2) Phalapeksaning krama desa :
- ha. Krama desa samian yogya polih pasayuban wiadin pangoban saking desa, saluiring wiawaharanya yogya kabaosang antuk Prajuru Desa manut tata titining wiawahara;
 - na. Krama Desa sajabaning Tamiu samian wenang ngalaksanaang Panca Yadnya sajeroning desa, manut desa kala patra kalih nganutin sane kinucap sajeroning sastra agama Hindu;
 - ca. Krama Desa Marep, Krama Balu Lanang wenang polih babagian layuban aci-aci saluir ipun, tuas-tuasan, miwah sane patut katiba ring krama desa, yan krama teruna polih apahempatan.
 - ra. Mapuangkid, nyaluk utawi tan tedun maayahan, yogya saking panglokikan kalih Prajuru Desa.

Palet 2

Indik Tata Praja Desa

Pawos 8

- (1) Prajuru Desa Adat Jumenang, luire :
 - ha. Bandesa;
 - na. Pamadhen Bandesa;
 - ca. Panyarikan Desa;
 - ra. Juru Raksa;
 - ka. Pangarah.
- (2) Sabha Desa Adat Jumenang, luire:
 - ha. Manggala sapisanan Angga;
 - na. Panyarikan sapisanan Angga;
 - ca. Angga
- (3) Kertha Desa Adat Jumenang, luire:
 - ha. Manggala sapisanan Angga;
 - na. Panyarikan sapisanan Angga;
 - ca. Angga

- (4) Banjar Adat, luire:
 ha. Keliyang Banjar Adat;
 na. Panyarikan;
 ca. Juru Raksa;

Pawos 9

- (1) Sane wenang kaadegang wiadin kamanggehang dados Prajuru Desa, luire :
 ha. Krama Ngarep sane jenek magenah, makrama desa, matata turun cumek, mayahan saurah-arih ring Desa Adat Jumenang;
 na. Tan cedangga, sakadi peceng, perot, cungh lan sapanunggilan ipun, sane katandangin kabakta saking wau embas;
 ca. Wikan mamaos kalih nyurat Aksara Bali utawi Latin;
 ra. Mabukti tan naen malaksana corah.
- (2) Pidabdab ngadegang Prajuru Desa :
 ha. Paruman Desa ngawentenang saseliran. Pangawit Paruman Desa matujuwang sang pacang kaadegang dados Bandesa, yan kantos lintangan ring adiri sane katuju antuk Paruman Desa, pamargine manut pararem;
 na. Mungguing ngadegang Pamadhen Bandesa, Panyarikan, Juru Raksa, Pangarah saking panyudin Bandesa, sane kabriukin antuk Paruman Desa taler sane akehan yogya turut;
 ca. Lamine dados Prajuru Desa wantah limang warsa saking dina pangadegane sajaba kapadgatakalan minakadi sangkaning wenten wiawahara;
 ra. Yan sampun naen madeg pinaka Prajuru Desa, dados kasudi malih;
 ka. Yan wenten sinalih tunggil piwal kalaning kasudi antuk Paruman Desa, sang piwal punika wenang katiwakin panglokika, yan tan manut paksania yogya kabaosan antuk Paruman Desa, yan jati tuhu paksania, Paruman Desa wenang nyudi sane siosan.

Pawos 10

Swadharmaning Prajuru Desa :

- ha. Minabdabin desa, krama desa, pacang ngupadi kajagadhitan sakala niskala, maka darsana Awig-Awig Desa, Pararem Desa, Pamutus Pararem Desa, nganutin uger-uger nagara minakadi sastra Agama Hindu;
- na. Ngarancana saluiring utsahan Desa kaungkur, ngarancana saluiring sane nyandang pacang wangunang, sane patut ayum, manut lokika desa kala patra, sane mabuat, mangda kasidan polih palugrahan Sang Amawarat;
- ca. Mamaosin saluiring wiawahara utawi wicara sane wetu sajeroning Desa Adat Jumenang, niwakang tatimbang, utawi pamutus babaos sane yogya kaputusan sajeroning desa adat. Yan tan kasidan kabaosan ring desa, Prajuru Desa mitudhang mangda ngaturang ring Sang Amawarat mangda kabaosan;
- ra. Meratiaksa, nulingaang saparipolah Prajuru Desa. Luire, Keliyang banjar, Pamangku-Pamangku Desa, pamangku kahyangan jagat, minakadi sane siosan

- sane wenten sajeroning wawengkon Desa Adat Jumenang;
- ka Midabdabin saluiring pamargin aci-aci ring wawidangan Desa Adat Jumenang, taler nulingaang krama indike ngalaksanaang Panca-yadnya;
- da Prajuru Desa wenang nyanggra saluiring pituduh, minakadi saraja karya saking Sang Amawarat, werat utawi ringan, sane yogya katiwak ring desa adat.
- ta Nyanggra saraja karya ring pura Kahyangan Jagat sane kaempon antuk Desa Adat Jumenang;
- sa Pinaka duta pacang matemuang babaos ring sang sapa sira ugi, yan paindikan punika kapineh nyandang pacang marginin;
- wa Wenang ngawangunang Pacalang Desa, sane patut nulinga katreptian sawawengkon Desa Adat Jumenang. Mungguing ngadegang, swadharma minakadi phalapeksa Pacalang mungguh sajeroning Pararem Desa;
- la Wenang ngawangunang sekaa-sekaa siosan, sane pacang ngaremba swadharma Prajuru Desa sane kabuatang;
- ma Prajuru Desa kaadegang majalaran antuk pawintenan sane kalaksanaang Pamutus Pararem Desa.

Pawos: 11

- (1) Sane dados kaadegang wiadin kamanggehang maka Sabha Desa Adat Jumenang, inggih punika utusan saking banjar adat sane wikan ring adat saha Awig-Awig Desa, akeh ipun mangda gasal;
- (2) Sabha Desa kaadegang olih Prajuru Desa Adat, mawaneng 5 (limang) warsa;
- (3) Swadharmaning Sabha Desa, sane madue wawenang ngaturang dharma tatimbang ring Prajuru Desa Adat;

Pawos: 12

- (1) Sane dados kaadegang wiadin kamanggehang maka Kertha Desa; luire:
 - ha. Prajuru Desa Adat Jumenang, kamanggala antuk Bandesa Adat;
 - na. Utusan saking banjar adat sane wikan ring adat saha Awig-Awig Desa;
 - ca. Sapasira ugi krama desa ngarep sane kapineh patut manut pararem.
- (2) Kertha Desa kaadegang olih Prajuru Desa Adat, mawaneng 5 (limang) warsa, saha akeh ipun mangda gasal.
- (3) Swadharmaning Kertha Desa:
 - ha. Madue wawenang nerima, nureksa miwah maosin sahaning wicara sane metu ring desa adat;
 - na. Dasar muputang wicara malarapan antuk Awig-Awig mingsingghang para sparo sarpana ya;
 - ca. Yan tan prasida puput wicarane, Kertha Desa patut ngaturang ring Majelis Desa Adat (MDA) manut papalihan.

Pawos 13

Phalapeksa Prajuru Desa, Sabha Desa miwah Kertha Desa :

- ha. Luput wawijilan manut pararem;
- na. Wenang polih tuas-tuasan;

- ca. Wenang polih pikolih saking gunakayan desa sane ngaranjing ka desa manut pararem;
- ra. Yan sajeroning kari madeg dados Prajuru Desa, Sabha Desa miwah Kertha Desa raris seda polih pangelad saking desa, Yan sampun usan sangkaning rahayu taler polih pangelad.

Pawos 14

Prajuru Desa, Sabha Desa miwah Kertha Desa kagentosin utawi usan, majalaran antuk :

- ha. Seda;
- na. Mabukti sungkan rahat tur suwe kantos lintang awarsa;
- ca. Mapinunas sangkaning rahayu, saha polih lugraha saking Paruman Desa.
- ra. Tutug sengker pangadege;
- ka. Malarapan antuk iwang.

Palet 3

Indik Sangkepan lan Paruman

Pawos 15

Mungguing sangkepan miwah paruman ring sajeroning wawengkon Desa Adat Jumenang, kadi ring sor puniki :

- ha. Sangkepan Prajuru Desa magenah ring *Bale Paruman Desa* wiadin genah siosan, sanunggil *dina anggara Kliwon*, yan tan kasidan rahina punika, wenang karangkadang apanutan, teges ipun malih limang rahina saking dina pasangkepan desane, manut sakabuatan taler dados kawentenang padgatakala;
- na. Sane patut nedunin sangkepan punika, Prajuru Desa, Pamangku Desa, minakadi sang sapasira ugi sane kabuatang antuk Prajuru Desa;
- ca. Maka manggalaning mababaosan sajeroning pasangkepan, paruman, manggeh Bandesa wiadin silih sinunggil Prajuru Desa saking palugrahan Bandesa;
- ra. Banjar Adat, sekaa-sekaa siosan tan kalugra ngawentenang sangkepan kalaning dina pasangkepan Prajuru Desa lan Paruman Desa, yan prade wenten mamurug, yogya sangkepan sekaa inucap kawangdeang;
- ka. Paruman Desa Adat Jumenang :
 - 1) Sane yogya tedun sareng sajeroning Paruman Desa, inggih punika sang sapasira kapatut miwah kabuatang, manut pangundang wiadin panuur Prajuru Desa;
 - 2) Paruman punika kawentenang pinih sor kalih temuang sane awarsa, taler kawentenang padgatakala nganutang desa kala patra, mawit saking pamutus babaos sangkepan desa;

ca. Sangkepan Banjar :

- 1) Sangkepan banjar, ugi ngasasih teges ipun 35 (sasur) dina, dinan ipun manut awig banjar;
 - 2) Keliyang Banjar pinaka manggala ring sangkepan banjar;
 - 3) Saya, manut pagilih Urak.
- ta. Sangkepan sekaa-sekaa, Dadia, sane wenten sajeroning desa, manut Awig-Awig sekaa kalih dadia soang-soang.

Pawos 16

Tata kramaning pasangkepan wiadin paruman :

- ha. Saya patut makta pasayaan, tegap eteh-ete pasayaan, manut pagilih hurak, saluir ipun, aturan canang pangraos, canang panyacak, saha pasegeh;
- na. Ritatkala paruman padgatakala, yan kapatut pacang nganggen babanten sakabuatan, Prajuru Desa, Keliyang banjar, yogya mituduhang mangda cumawis, saha nyukserahang padagingan;
- ca. Saya wenang nepak kulkul ping tiga :
- 1) Kaprathama : sadurung ngawit upacara utawi maturan, pinaka pakeling mangda gelis carem, sasampun carem, ngraris aturan punika kaantebang, mabriuk muspa sareng sami kantos puput;
 - 2) Kaping kalih : suaran kulkul maka cihna sangkepane kakawitin;
 - 3) Kaping tiga : suaran kulkul maka cihna sangkepane sampun puput.
- ra. Babaosan sajeroning sangkepan wiadin paruman, kamuruban Sang Hyang Widhi, majalaran bhawa laksana manut dresta;
- ka. Yan wenten sinalih tunggil ngatengahang babaos jroning sangkepan, yogya kadamyakang, yan nyandang baosin, yogya rinaosan, yan tan nyandang baosin, antukang ring sang ngamimitin;
- da. Sane kinucap pamutus babaos, wiadin pasuara sajeroning sangkepan wiadin paruman malarapan antuk briuk sapanggul anut sang nyangkepin, yan tan sapunika, asing akehan wenang turut manut lokika, pamutus babaos yogya kalekitaang, kalaksanaang manut hanggeran;
- ta. Prade tan puput babaose sajeroning sangkepan kantos ping tiga, patut katengahang sajeroning paruman, pamutus babaos sajeroning paruman pinaka pamuput;
- sa. Sangkepan punika kabaos puput, yan sampun nimbalang pagilih saya, saha sampun mabacak.

Palet 4

Indik Kukul

Pawos 17

- (1) Sajeroning wawengkon Desa Adat Jumenang, wenten bacakan kukul, kadi ring sor puniki :
 - ha. Kukul Desa;
 - na. Kukul Pura;
 - ca. Kukul Banjar;
 - ra. Kukul sekaa-sekaa siosan.
- (2) Mungguing suaran kukul punika mangda mabhina-bhinayan sawiji soang, manut sor singgih, yan wenten suaran kukul pateh, karun wiadin sawer, patut kapastika salah sawiji, antuk sang madue;
- (3) Nepak kukul manut Tri Brata Sandhi : dharma, sima, laksana, teges ipun :
 - ha. Dharma : suaran kukul maka cihna tatenger upacara Yadnya;
 - na. Sima : suaran kukul maka cihna wiadin tatenger Panca bhaya;
 - ca. Laksana : suaran kukul maka cihna wiadin tatenger patedunan.
- (4) Indik tatepakan kukul manut pasobhaya minakadi kuna dresta :
 - ha. Atulud : Patedunan;
 - na. Dwang tulus : Kaicalan;
 - ca. Tigang tulus : Kasedaan;
 - ra. Kukul bulus : Panca bhaya
 - ka. Tigang kelentungan banban : Ngandegang Patedunan.
- (5) Ungguan nepak kukul :
 - ha. Yan nepak kukul tatenger patedunan, ugi kukul sane kadue antuk sekaa, krama sane pacang tedun katepak antuk sang patut ngukulung;
 - na. Yan nepak kukul tatenger Panca bhaya, wenang saungguan-ungguan, asing nampek genahe, wenang katepak antuk sang riinan manggihin bhaya punika, minakadi saking pituduh sang ngawiwenang;
 - ca. Yan nepak kukul tatenger upacara Panca Yadnya, wenang kukul sane wenten ring soang-soang genah upacarane. Yan nyelang kukul siosan patut wenten palugrahan sang ngawiwenang;
 - ra. Yan kalaning ngalungaang bhatara, mendak bhatara, Bhatara turun kabeh, kalaning pacaruan desa luire manca-satha, manca sanak, tabuh gentuh ring Desa Adat Jumenang, sami kulkule dados suarayang, tatepakan manut dresta;
 - ka. Yan wenten mamurug nepak kukul tan manut, yogya kabaosin antuk Prajuru Desa, katiwakan panglokika saha pamidanda manut pararem.

Palet 5

Indik Paduean Desa

Pawos 18

- 1) Sane kadue antuk Desa Adat Jumenang, luire :
- ha. Pura kahyangan Tiga :
 - na. Pura Kahyangan Desa;
 - 1) Pura Prajapati;
 - 2) Pura Beji;
 - 3) Pura Pajenengan.
 - ca. Pura kahyangan sane kaempon kaupapira kaaci-acinin antuk krama desa, luire :
 - 1) Pura Sad kahyangan Lempuyang Luhur;
 - 2) Pura Pasar Agung;
 - 3) Pura Tirta Mas;
 - 4) Pura Pasanggrahan Manik Kembar Lempuyang Luhur;
 - 5) Pura Penataran Agung Pucak Gunung Kembar Kenusut;
 - 6) Pura Pesimpenan Lempuyang Luhur;
 - 7) Pura Pasucian Toya Lesung Taman Sari;
 - 8) Pura Pasucian Dukuh;
 - 9) Lan Pura sane siosan.
 - ra. Palemahan sane kaanggen karang pomahan miwah telajakan karang kawit saking paduean desa;
 - ka. Palemahan sane kaanggen margi, rurung, tukad sajeroning desa;
 - da. Banjar;
 - ta. Pasar Desa;
 - sa. Tanah palabha Pura Desa lan Pura Kahyangan Jagat, kalih tanah ayahan desa manut lekita;
 - wa. Sakancan kalebutan toya, toya anakan, tiisan, sane dados kaanggen pasucian Bhatara, sane dados kaanggen beji, miwah kasalud antuk krama desa, sane dados tantan ka desa;
 - la. Pralingan Bhatara;
 - ma. LPD lan CBD;
 - ga. Lelanguan minakadi :
 - 1) Angklung;
 - 2) Gong;
 - 3) Baleganjur;
 - 4) Lan sane siosan.
 - ba. Wewalen minakadi :
 - 1) Rejang;

- 2) Baris;
 - 3) Pendet;
 - 4) Lan sane siosan.
- 2) Pioli-oli desa luire :
- ha. Pamupon Plaba Pura;
 - na. Urunan, Panaub, Pakenen-kenen pakaryan krama desa;
 - ca. Dana punia;
 - ra. Simpan pinjam LPD miwah CBD;
 - ka. Utsaha desa, gunakaya krama desa.

Palet 6

Indik Laluputan

Pawos 19

- (1) Sane kabaos luput inggih punika tan keni papeson;
- (2) Sane polih laluputan, luire :
 - ha. Prajuru Desa;
 - na. Pamangku Desa lan Pemangku Sad Kahyangan;
 - ca. Sang sapisira ugi sane kapineh antuk desa patut nyandang polih laluputan, manut pararem.

Palet 7

Indik Dadosan Patedunan

Pawos 20

Dadosan saluiring Palet, sangkepan, tedun makarya miwah sane siosan, nganutang sukerta soang-soang, luire :

- 1) Yan Prajuru Desa madue patedunane, yogya nganggen sukertan desa, sane kagaduh antuk Prajuru Desa, dadosan ngaranjing ka desa;
- 2) Yan babanjaran madue patedunane, yogya ngangge uger sukertan banjar soang-soang sane sampun kagaduh antuk banjar punika. Dadosan ngaranjing ka banjar;
- 3) Yan sekaa-sekaa siosan, madue patedunane, yogya nganggen uger sekaa soang-soang, dadosan ngaranjing ka sekaa;
- 4) Yan wenten krama sinalih tunggil tan tinut ring tatepasan miwah dadosan punika, yogya katengahang babaose ka desa, Prajuru Desa wenang mamaosin saha niwakang pamutus.

Palet 8

Indik Bhaya

Pawos 21

- (1) Sane kinucap Pancabhaya, luir ipun :
 - ha. Jiwa bhaya;
 - na. Ageni bhaya;
 - ca. Toya bhaya;
 - ra. Artha bhaya, lan
 - ka. Bayu bhaya.
- (2) Saluiring bhaya wenang geherang antuk suaran kulkul;
- (3) Sang sapisira ugi krama desa sane manggihin, wiadin uning ring panangkaning bhaya, wenang ngeherang nepak kulkul bulusraris damyakang ring krama desa;
- (4) Rikala wenten suaran kulkul bulus tatenger bhaya, krama desa patut yatna, sayaga, saha sregep ngamong prabot wiadin gagawan soang-soang;
- (5) Yan sampun tatas ring bhaya punika, krama desa patut matatulung nambakin bhaya punika, manut ungguan, kalih manut patuduh sang yoga ngawiwenangang;
- (6) Sang sapisira ugi tan kawasa majajabur utawi majajarah rikalaning desa, krama desa katiben bhaya, yan wenten mamurug, yoga katengahang ka desa, wiadin katur ring Sang Amawarat;
- (7) Yan pinganan bhaya punika sampun kapineh nahnah, tan pacang nyangkalen wenang kacihnaang antuk suaran kulkul lambat atuludan, wiadin pasiar saking sang ngawiwenangang.

Palet 9

Indik Rarampagan lan Kekeran Desa

Pawos 22

- (1) Desa wenang ngarampag ritatkala pacang :
 - ha. Mapawangun;
 - na. Pujawali.
- (2) Mungguing indik rarampagan kamargiang manut pararem;
- (3) Yan duen Ida Sulinggih, Sang Amawarat, patut katunas;
- (4) Tan kalugra nebtob, ngarebah, wit-witan saluir ipun, ring palasan, pategalan, abing, tangkid, alas miwah genah siosan sane kakeker antuk desa, yan wenten mamurug, kapidanda manut pararem;
- (5) Saluiring wit-witan sane sampun kasawenin antuk desa pacang mangge mapawangun ring desa, pradene punika karebah antuk sang madue, yoga kapidanda manut pararem;

- (6) Godel sane pacang anggen pacaru (bayang-bayang) wenang kakeker, nanging mataur manut pangarga;
- (7) Yan kalaning ngarampang, sang ngarampang ugi masadok saha sadu ajeng ring sang madue utawi panyakap;

Palet 10

Indik Panyanggran Banjar, Krama Desa

Pawos 23

- (1) Saluiring karya sane patut kasanggra antuk desa, kapastikayang ring pararem desa;
- (2) Saraja karyan desa kasanggra antuk krama desa, kaunadikaang antuk Prajuru Desa;

CATHURTAS SARGAH

SUKERTA TATA AGAMA

Palet 1

Indik Dewa Yadnya

Kaping 1

Indik Kahyangan

Pawos 24

- (1) Pura Tri Kahyangan lan Pura Kahyangan Desa sane kadue utawi kaemponin antuk desa, pangaci-acine manut pagilih, taler manut gagaduhan pura soang-soang;
- (2) Pura Kahyangan jagat sane magenah ring wawidangan desa, sane kaempon, kaupapira, kaaci-acinin antuk krama desa nganutin ririgan, luire;
 - ha. Pura Sad Kahyangan Lempuyang Luhur, kala dina Umanis Galungan;
 - na. Pura Pasar Agung, kala dina Umanis Galungan;
 - ca. Pura Tirta Mas, Kala dina Umanis Galungan;
 - ra. Pura Pasanggrahan Manik Kembar Lempuyang Luhur, kala dina Purnama Sasih Kalima;
 - ka. Pura Penataran Agung Puncak Gunung Kembar Kenusut, kala dina Purnama Sasih Kalima;
 - da. Pura Pesimpunan Lempuyang Luhur, kala dina Umanis Galungan;
 - ta. Pura Pasucian Toya Lesung Taman Sari, kala dina Purnama Sasih Kalima;
 - sa. Pura Pasucian Dukuh (Panca Tirta), kala dina Soma Pon Sintha.
- (3) Mungguing beji, papayon, kalih pangaci-acinia kaemponin antuk krama desa, yan wenten beji tan kaaci-acinin, toyan ipun tan yogya angege sadana sarwa suci;

- (4) Yan wenten karecehan, wicara, sajeroning pamaksan pura, beji, kahyangan, sinalih tunggil, wenang katengahang ka desa, Prajuru Desa mamaosin, nepasin wicarane, mangda kasidan mawali landuh jatimula;
- (5) Tan wenang nguwah-nguwuhin wawilangan palinggih bhatara, sane wenten ring pura kahyangan soang-soang, mangda kantun manggeh kadi kuna;
- (6) Yan wenten Pura Kahyangan sinalih tunggil, reneng pangaci-acinya kantos kadasawarsan, yogya Prajuru Desa mamaosin, maritetes, ngutsahaang mangda kasidan mawali kadi jatimula. Yan prade tan kasidan, majalaran antuk pamutus Paruman Desa, prasida desa ngawangunang pangupacara mralina pura punika, mangda tan karanjangan kaumahin antuk Ki Bhuta Kubandha;
- (7) Yan wenten pura sane magenah ring wawidangan desa, panyungsung miwah pangempon sami magenah ring liwaring desa, yogya pangempon pura punika ngaturang punia sinunggil pacaruan Tilem Kasanga ring desa ngamasa-masa. Napkala pacang pangaci-aci ugi mangda masadok ring Prajuru Desa.

Kaping 2

Indik Pangaci-aci

Pawos 25

- (1) Indik pangaci-aci ring pura Kahyangan Desa miwah Kahyangan Jagat, sane kaamongin antuk Krama Desa, mungguwing prabea kasandangin antuk Krama Desa;
- (2) Sane yogya muput aci-aci ring pura kahyangan desa inggih punika Ida sulinggih sane katuur, utawi kaanteb antuk pamangku ring pura inucap;
- (3) Yan pangodal alit wenang kaantebang antuk pamangku desa;
- (4) Ritatkala Bhatara turun kabeh, pura pasimpenan luire : kaler, kelod lan kangin, ugi mangda ngias pura saha ngadegang bhatara manut dresta;
- (5) Ritatkala kabrebehan jagate, kageringan, katiben panca bhaya, pinganan tan mersidaang ngaturang aci kadi patute, yogya Prajuru Desa miwah Pamangku, ngaturang piuning ring bhatara, manut dresta;
- (6) Riwus mawali degdeg jagate, patut kamargiang bhatara turun kabeh, masasirih makakobok ka sagara giri, manut dresta;
- (7) Yan wenten sinalih tunggal pura sane kaempon antuk desa sane durung madue Pamangku, utawi Pamangkune kapialang, dados nuur sinalih tunggil pamangku Kahyangan Desa;
- (8) Indik pangaci-aci Pura Pamrajan, Pahibon, Dadia, punika kaamongin antuk krama sane nyungsung, manut sima dresta soang-soang;
- (9) Usabha ring Kahyangan Desa manut dudonan, luire :
 - ha. Pura Puseh kala dina Purnama Kapat sator ipun limang warsa;
 - na. Pura Bale Agung, kala dina purnama Kapat sator ipun limang warsa;
 - ca. Pura Dalem miwah Prajapati, kala dina tilem sasih katiga sator ipun limang warsa;

- ra. Sajaba ngusaba, pangaci-aci siosan manut dresta kuna, luire :
- 1) Ring rahina Galungan krama desa ngamargiang upacara Galungan. Sekaa Teruna nedunang Pralingga Bhatara saking pasimpenan, kairing ke Pura Penataran Agung Puncak Gunung Kembar Kenusut lan ka pura Lempuyang Luhur, manut pagilih lan dresta;
 - 2) Ring rahinan Kuningan, ngamargiang upacara Kuningan;
 - 3) Ring rahina sasih kedasa ngamargiang upacara Nangluk Merana ring Pura Penataran Agung Puncak Gunung Kembar Kenusut sasor ipun ngawarsa;
- (10) Padagingan pacang ngaci-aci :
- ha. Piturunan lan wawijilan krama desa;
- na. Pioli-oli pagunakayan krama desa;
- ca. Aturan-aturan sangkaning krama suka nirmala;
- ra. Pioli-oli tanah ayahan desa lan tanah-tanah palaba pura duen Desa Adat Jumenang;
- (11) Yan ritatkala mamaayu, ngayum papayon, ring pura kahyangan, pinganan tan puput kala dinaning piodalan, pangacine wenang rangkadang, nanging padatengan, pacanangan tan dados pegatang. Ri huwus puput masasapuh saluire malih mawali kadi kuna.

Kaping 3

Indik Sukerta Pura Kahyangan

Pawos 26

- (1) Rikalaning ngaturang pangaci-aci amung pamangku ring kahyangan punika sane dados munggah tedun ring pura kahyangan inucap, utawi sang sampun polih lugraha saking Pamangku Pura inucap utawi saking Prajuru Desa. Yan mamurug kapidanda mrayascita manut pararem;
- (2) Tan kalugra masumpah, macoran sajeroning pura kahyangan sinalih tunggil, sajaba sangkaning wicaran pura inucap, taler saking pabuat krama pura utawi krama desa sane ngempon pura kahyangan punika;
- (3) Tan kalugra wak capala (mamisuh) miwah sapanunggilan ipun, asta capala (nyagur), pada capala (nendang, nlejek), miwah sapanunggilan ipun, sajeroning pura kahyangan. Yan macihna wenten mamurug, wenten raris ngatengahang ka desa yogya tiniwakan danda pamarisudhan kahyangan;
- (4) Tan kalugra malaksana kantos ngawetuang biota ring pura kahyangan. Sang malaksana kapineh sampun napak wirang, yan mamurug, yogya tiniwakan danda manut pararem;
- (5) Sedahan ngengengan miwah sapanunggilan ipun tan kalugra maseha ring Pura kahyangan. Yan mamurug, keni pamidanda manut pararem;
- (6) Tan kalugra ngawentenang kaklecan, jajuden, sajeroning suter utawi panyenger Pura Kahyangan (Utama mandala, Madhya mandhalaning Pura

- Kahyangan). Yan mamurug sang ngalaksanaang keni pamidanda manut pararem tur katur ring Sang Amawarat;
- (7) Tan kalugra makta saluiring sane kasinanggeh tan suci ka sajeroning suter utawi panyengker Pura Kahyangan. Yan mamurug, yogya marisuda pura punika manut pararem;
 - (8) Sang sapasira ugi rikalaning makemit ring Pura Kahyangan, yan merem, tan kalugra madukan lanang istri, sajaba anak sane kapineh kari alit. Yan mamurug keni danda manut pararem;
 - (9) Pamaksan soang-soang pura Kahyangan, kalugra madue sukerta soang-soang, nanging tan dados singsal ring Pasukertan Desa;
 - (10) Pura kahyangan tan wenang kaanggen sajaba ngalaksanaang upacara agama Hindu. Yan mamurug, upacara punika kawangdeang, tur kapidanda manut pararem;
 - (11) Sang sapasira ugi, kapangluh sajeroning pura kahyangan, ring gelis tunasang tirta laluputan mangda gelis udep, yan tan udep patut pintonin, ambilang toya apane, celebang liman nane makakalih. Yan mabukti tan belus, nyandang gega pangandikan Bhatara. Yan pade belus, tan nyandang gega, gelisang gingsirang genahang mangda doh saking pura inucap;

Kaping 4

Indik Pamangku

Pawos 27

- (1) Soang-soang Pura Kahyangan ugi madue pamangku;
- (2) Sane tan wenang kaadegang dados pamangku luire :
 - ha. Cedangga saking wau embas;
 - na. Mabukti sungkan rahat;
 - ca. Mabukti naen malaksana corah lan mamurug Awig-Awig.
- (3) Pidabdab ngadegang pamangku luire :
 - ha. Ngambil saking saserod santana utawi katurunan;
 - na. Saking pamuus sasemburan, wiadin nyanjan kantos pang tiga; utawi
 - ca. Sangkaning kajujuh saha kabriukin antuk krama desa manut pararem.
- (4) Pamangku pura punika wantah pamangku Pura Puseh, Pura Dalem, Pura Desa minakadi Pamangku Kahyangan sane wenten sajeroning Desa Adat Jumenang, kalugra nganteb banten pangodal, minakadi sane siosan ring pura sawawengkon desa sane mamuatang, taler manut kawenangan Pamangku;
- (5) Sang sapasira ugi pinaka pamangku jan panggul ring Pura Kahyangan Desa, Pura Kahyangan Jagat miwah pura siosan sane wenten ring sajeroning desa, mangda pageh ngamel kalih ngalaksanaang sasanan Pamangku;
- (6) Sang sapasira ugi krama desa, kaadegang dados pamangku, yan kari alaki rabi yogya lanang istri mawinten;

- (7) Sang kasudi pacang kanggen Pamangku, patut mawinten ring Pura genahe dados pamangku. Mungguing prabea kasandangin antuk krama pura soang-soang, pamangku desa kalih pamangku kahyangan jagat kasandangin antuk krama desa;
- (8) Pamangku patut madue amongan pura soang-soang, yan tan madue amongan pura, prasida tan kalugra ngantebang babanten ring pura;
- (9) Yan Pamangku katekan pati, yogya tiniwaken, patut polih patulung prabea atiwa-tiwa. Yan pamangku desa kalih pamangku kahyangan jagat polih patulung saking desa. Yan pamangku siosan, polih patulung saking krama pura soang-soang. Agung alit patulunge nganutin pararem;
- (10) Yan pamangku desa utawi pamangku kahyangan jagat kantun rajeg ngamong swadharmaning pamangku raris hantaka, patut polih pangelad utawi pasengaukan, wiadin papekatan saking desa;
- (11) Tuas-tuasan Pamangku, mungguh manut gagaduhan pura soang-soang utawi pararem desa;
- (12) Pamangku kagentosin majalaran antuk :
 - ha. Seda;
 - na. Mapinunas mararyan lan sangkaning kausanang, kawekas kalaning seda tan polih patulung prabea atiwa-tiwa;
 - ca. Saking patut pinunase, majalaran antuk lingsir, sampun tan mampuh, sungkan rahat tan kengin waras, kajadaang antuk krama pura, wiadin desa, kawekas kalaning seda patut polih patulung prabea patiwa-tiwaan;

Kaping 5

Indik Cuntaka, miwah Sosot

Pawos 28

- (1) Sane kinucap cuntaka, Luire :
 - ha. Anak istri kalaning ngraja, suwen cuntakane saking ngawit ngraja, kantos macihna sampun malukat;
 - na. Sang nganten lanang istri, suwene cuntaka, ngawit saking rahina pangantenane, wiadin rahina marangkate, sajeroning 3 (tigang) dina, kantos puput mabyakaon, saha masamayut prayascita, malukat matirtha.
 - ca. Rama rena cuntaka sangkaning ngembasang oka. Sane lanang cuntaka, suwene saking mbas anake alit kantos kepus odel, raris malukat. Sane istri pinaka rena, cuntaka petang dasa kalih dina saking wau embas rarene;
 - ra. Yan anak istri cuntaka sangkaning karuron, patch ring cuntaka ngembasang oka, lanange cuntaka tigang rahina saha sampun malukat.
- (2) Cuntaka malarapan antuk kasedaan, kapatian :
 - ha. Yan wenten anak alit durung kepus odel raris seda, rama rarene cuntaka, sane lanang 3 (tigang) dina, sane istri 42 (petang dasa kalih) dina;

- na. Yan sang ngarepin, minakadi sang magenah sajeroning karang pomahan sang seda, mawasta cuntaka karang suwene cuntaka, saking wau seda kantos puput panglemek karyane, punapike mapendem, luh yan atiwa-tiwa. Macihna punah cuntakane antuk marerebu, malukat;
- ca. Yan Sang polih ninjo, ngarap sawa, ngamel saha ngarembat sahete-hete pula palining sawa, cuntaka adina, punah cuntakane macihna antuk malukat;
- ra. Yan tunggal sidhikara pateh cuntakane kadi sang ngarepin sawa ika manut dresta;
- ka. Yan Sang manjing mijil ring umah sang ngaraksa sawa, wiadin layon sangkaning aninjo, tan kahanan cuntaka waluya mapas sang makta sawa ring margi agung;
- da. Yan sang polih nyembah sawa, mangan paridan sawa, punika taler kabaos cuntaka, suwene cuntaka kantos sampun husan malukat.
- (3) Sang sapasira ugi kacuntakan, saluiring cuntaka, yan durung mabersih, tan kalugra ngaranjing ka pura kahyangan. Yan katenger wenten mamurug, yoga tiniwakan danda marisudha kahyangan punika;
- (4) Cuntaka sangkaning malaksana mamitra ngalang. Suwene cuntaka manut pararem;
- (5) Anak wetu sangkaning semara dudu utawi tan pawidhi widhana pawiwahan, babinjat punika taler cuntaka. Suwene cuntaka, salamine durung wenten meras, wiadin nuduk ngangkenin pianak, wiadin nganggen dadaman;
- (6) Cuntaka sangkaning mabukti madue panungkan sane tan sida waras salamine, kadi angganing hila, buduh, ngawijilang reged saking silit, bhaga, purus, tan enap mameres, berung borok tahunan mabanyeh, miwah saluir punika. Suwene cuntaka, salamine tan waras;
- (7) Cuntaka sangkaning cedangga sane kabakta saking wau mbas saking garbha wasaning ibu, punika tan kawenang napak palemahan panucyan genah nuci gening;
- (8) Sang sapasira ugi krama desa sane kahanan cuntaka, tan wenang ngaranjing ka Pura Kahyangan, ka panuciyon kalaning nuci gening, minakadi genah saluiring genah sane kinucap suci pingit. Tan wenang ngaryanin saji. Sajawaning banten sane pacang katur ka Prajapati, Dalem Panguluning setra, dados karyanin ring umah sang cuntaka kalaning mangupakara sawa;
- (9) Yan wenten cuntaka antuk ngeraksa sawa wiadin layon, mapakayun ngarauhin karyan ayu atma wedhana, wantah dados mabhakti ring sang wenang bhaktinin, saking liwaring piyadnyan;
- (10) Yan wenten krama desa durung tutug cuntakane, raris mamurug larangan, yan wenten ngatengahang ka desa, Prajuru Desa niwakang pamidanda manut pararaem;
- (11) Yan wenten anak istri, sangkaning tan meha ngraja ring pura, wiadin ring genah larangane siosan, raris kacirenan, wenang kapidanda tan meha manut pararem;

- (12) Rikalaning krama desa tedun makarya, sang kacuntakan amung dados ring nista mandhalaning pura. Yan mamurug wenang kadanda mrayascita;
- (13) Yan wenten krama desa, kacuntakan antuk ngraksa sawa, wiadin layon, napkala pagilih pagantosan subak babanjarania ngaci-aci ring kahyangan desa, wenang tan tedun mayahan, tan dinosan. Nanging yan wenten pasadok sang cuntaka ring Prajuru Desa. Yan wus tutug cuntakane, patut naregteg yan kari ngalantur patedunane. Mungguing piturunan, pawijilan daging, yogya kataur kaetang pangarga;
- (14) Yan cuntaka gamia gamana, Prajuru Desa ngaturang sang malaksana ring Sang Amawarat. Yan sampun wenten pamutus, ring desa kapidanda manut pararem;
- (15) Cuntaka sangkaning mabukti salah timpal, kapidanda manut pararem. Buron sane kaajak masanggama kararung;
- (16) Anak luh beling tan kapariangken antuk lanange, suwene cuntaka kantos wenten pangupakara panyangaskara kula wisudha, anake beling mawidhi widana pawiwahan masanding keris pinaka linggan sang purusa;

Pawos 29

(1) Indik Sosot :

- ha. Sapasira ugi pacang naur sosot wiadin punagi, saluiring punagi, sane patut nganggen pamegat sot, dados naur sosot yan tan kalaning dina piodalan. Ngadasa dinaang piodalan, sang pacang naur punagi patut masadok ring pamangu pura utawi Prajuru Desa, panauran punagi punika kapuput Ida Sulinggih kalaksanaang yan sampun putus banten pangodale;
 - na. Sapa sira ugi naur sasangi pacang ngaturang pangodal ugi mangda ring dina pagantosan piodalan. Sang naur punagi, wenang nunas kanti patulung karyan tur nyukserahang daging cumek saprabeaning pangodal. Mapisadok sakasep ipun tigang sasih sadurung dina pangodale;
 - ca. Sapasira ugi naur sasangi suaran tangguran saluiring tatabuhan, sasolahan, minakadi saluir ipun, mungguing prabea punika sami kaangganin antuk sang masasangi;
 - ra. Indik kakalapan ritatkala krama desa naur sasangi manut dresta.
- (2) Sapasira ugi ngaturang Dana Punia, punika sami patut kaunadikaang antuk Prajuru Desa, mangda kasidan mapuara ayu. Aturan punika kaungguhang sajeroning lekita;
 - (3) Sasampun puput pangaci-aci puja waline, sasarin canang punika kapupulang saha kawilangin. Kaunadikaang antuk Prajuru Desa, Keliyang Pura, indik tatiwak kalih pamargin ipun, sangkaning jati nirmala;

Palet 2

Indik Resi Yadnya

Pawos 30

- (1) Krama Desa, yogya ngawerdiang kapradnyanan, kautamaan Sang Hyang Aji, asewaka nunas pawarah ring sang maraga widagdha pradnyan, pingajeng ring sang kasinangguh guru loka;
- (2) Prajuru Desa, ngutsahaang kawerdian kamuruban kautamaan Sang Hyang Aji, ngawentenang paruman, parembugan, pinaka genah krama desa mamangguhang pawarah-warrah ayu;
- (3) Kalaning dewasa ayu, wenang desa atirtha yatra, wenang desa ngaturang punia miwah resi bhojana ring Ida Sulinggih. Taler kalaning karya utama ring desa, sahuring karya sane kaputus antuk Ida Sulinggih patut ngaturang punia. Asapunika taler ring sang mapitulung patut maweh dana;
- (4) Sapasira ugi krama desa mapakayun pacang mapodgala, taler mangda wenten pasadok ring Prajuru Desa, sajaba patut polih palugrahan saking Guru Wisesa;
- (5) Prajuru Desa, mamatut pisan, yan krama desane mapunia ring sang pradnyan, ring sang widagdha, ring sang satata ngarajegang dharmma, pingajeng ring Ida Sulinggih pasuryannyane soang-soang.

Palet 3

Indik Pitra Yadnya

Pawos 31

- (1) Pamargin ngupakara sawa wenten makudang-kudang soroh, luire :
 - ha. Mapendem ring pertiwi;
 - na. Makingsan ring geni;
 - ca. Atiwa-tiwa, utawi palebon, utawi ngaben;
 - ra. Yan rare durung makupak untu wus kepus odel hantaka, wenang ngangge pangentas bangbang masadhana klungah klapa gading, ngaran ngalungah, tan wenang kaabenang;
 - ka. Yan rare durung kepus odel hantaka, pamali ngaran, pendhem juga tan hana pangupakarania kewala ganten utawi adem paichan Ida Sulinggih.
- (2) Sapasira ugi, tan kawasa makta sawa ka desa, yan sawa ika sampun keni pangupakara sawa. Yan wenten mamurug, yogya kapidanda manut pararem;
- (3) Sahuring upacara atiwa-tiwa, palebon, ngaben, yan ngeseng ring setra ugi kawenangania, tan wenang ring desa. Yan mamurug, wenang kapidanda marisudha desa;
- (4) Yan wenten krama desa ngurung sawa, macamana, mabersih kawenangannia, tan kalugra lintangan ring asasih pitung rahina ngawit saking dina sedane. Yogya murnama Tilem. Padgatakala kalaning ngurung sawa ring Desa Adat Jumenang kawangunang karya agung kantos nyuci gening, luire matabuh

pramangkin. Sara ledang sang madue, minakadi Ida Sang Sulinggih sane pacang muput;

- (14) Yan wenten seda genahne sajabaning karang pomahan, yogya sang madue wirange mrayascita marisudha genah punika. Yan sawa tan kapariangkenan, genah punika patut kaparisudha kaprayascita antuk sang madue emponan;
- (15) Yan wenten krama desa kasedaan sajeroning jagi ngawangun upacara dewa yadna, yogya sang seda kaperemang kemanten, saha nenten kasobyahang, manut panglokikan Prajuru Desa.

Indik Angatma Wedana

Pawos 32

- (1) Sapasira ugi krama desa, yan kalaning angatma wedhana, luire : ngaroras, patileman, baligya, tan wenang ngawangunang petak, payadnyan, ring palemahan pura;
- (2) Sapasira ugi wus ngawangun karya angatma wedhana, yogya karang payadnyan ika kapralina, sakasepipun 42 (petang dasa kalih) dina saking dina karyane;

Palet 4

Indik Manusa Yadnya

Pawos 33

- (1) Sapasira ugi krama desa, ngawangunang saluiring upacara Manusa Yadnya, tan wenang magenah ring wawidangan palemahan pura kahyangan desa. Yan wenten mamurug, wenang kapidanda manut pararem;
- (2) Manusa Yadnya sane dados kamargiang sajeroning desa ugi nganutin dresta;

Palet 5

Indik Bhuta Yadnya

Pawos 34

- (1) Pacaruan manut ungguan, luire :
 - ha. Pacaruan Desa Sadakala :
 - 1) Panca satha ngamasa-masa, kala Tilem Kasanga, magenah ring pempatan agung, kaemponin antuk krama desa;
 - 2) Manca sanak, ngalimang masa, kala Tilem Kasanga;
 - 3) Tabuh Gentuh, ngadasa masa, kala Tilem Kasanga, nuju rah windu utawi manut sakabuatan.
 - na. Pacaruan Desa padgatakala : rikala jagate kabrebehan, kageringan, kadurmanggalan, katiben Panca-bhaya, miwah sane siosan patut carunin;
 - ca. Agung alit caru, manut ungguan macaru, babwatan pacaruan, kalih nista Madhya utamaning caru manut gagaduhan pura inucap.

- (2) Pasegeh tunggil Kajeng Kliwon, Purnama, Tilem, kasanggra antuk pamangku soang-soang. Padagingan saking palabha Bhatara ring Puseh Desa Adat Jumenang, kaantebang antuk pemangku soang-soang;
- (3) Pacaruan ring pura Kahyangan, Pamrajan, Dadia saluire, manut dresta minakadi gagaduhan pura soang-soang;
- (4) Pacaruan ring Pura Dalem, manut dresta minakadi gagaduhan Pura Dalem ika;
- (5) Pacaruan ring banjar sajeroning desa, rikala Kajeng Kliwon nuju sasih karo, ngararis pacaruan ring karang pomahan soang-soang;
- (6) Yan wenten sinalih tunggal Pura Kahyangan, reneng pacaruane sasune kantos 5 (limang) plabuh, wenang Prajuru Desa mamaosin. Yan wus puput babaose, yogya maguru piduka, ngawit masasapuh mangda kasidan ngaturang pangaci-aci;
- (7) Ring rahina sasih kasanga ngamargiang upacara labuh gentuh ring parempatan agung desa;
- (8) Pacaruan kalaning Tilem Kasanga, ring karang pomahan soang-soang manut dresta, saha kalanturang antuk brata panyepian.

PANCAMAS SARGAH

SUKERTA TATA PALEMAHAN

Palet 1

Indik Tegal, Bangket lan Karang

Pawos 35

- (1) Palemahan desa, mauger antuk Tri Mandhala, luire :
 - ha. Utama-mandhala : palemahan sane kaanggen karang pura, wiadin parhyangan;
 - na. Madya mandhala : palemahan sane kaanggen karang pomahan, genah wawangunan, sakadi : banjar, sekolah, kantor, rumah sakit, miwah sane siosan;
 - ca. Nista mandhala : palemahan sane kaanggen setra, margi, rurung, papunduk, telajakan karang, genah ngingsanang wahana miwah sane siosan sane magenah ring sawewengkon desa;
- (2) Sahanan palemahan sane wenten ring wawengkon desa, yogya mangda madue babaledan wiadin wates sane pasti;
- (3) Sahanan palemahan punika, ugi mangda madue margi, rurung, papunduk sane dados kaentasin;
- (4) sang sapisira ugi pacang mapawangun pakarangan, pomahan, pura miwah sane siosan, patut ngutsahaang mangda madue margi;
- (5) Yan wenten pakarangan pura, pomahan, tegal, carik miwah palemahan siosan kabebeng tan madue margi, rurung, miwah papunduk, sang madue patut ngatengahang babaose ka desa, Prajuru Desa yogya negdeg, ngutsahayang

- mangda polih margi malarapan sami suka. Yan patut matumbas, manut pangargan tanah sane kamanggehang antuk Sang Amawarat, sami kataur antuk sang mamuatang;
- (6) Yan desa pacang ngalinggahang margi, rurung, minakadi makarya margi, rurung desa, saking sampun ingkup pasuaran desa kalih sang madue tanahe, yan nganggen tegal, carik miwah palemahan siosan, wenang ngamargiang sasempalan antuk desa tan naur pangargan tanah punika. Nanging yan madaging tatanduran, papayon, wawangunan saluire, desa patut ngicen prabea agung alit manut pararem;
 - (7) Sahananing karang pomahan ugi mangda masengker. Pidabdab nyengker, magaleng kadulu. Panyengker sane sisi kangin miwah kaler, patut kakaryanin antuk sang ngenahin karang punika, sajaba karang ngele wiadin lingkehin rurung, palemahan suwung;
 - (8) Sang sapasira ugi ngenahin karang tegehan, patut naku, tegehe asukat natah dangsah, sane tebenan, wenang nyusunin tembok;
 - (9) Telajakan karang patut kapiara antuk sang ngenahin karang punika soangsoang, mangda mapikenoh tur asri;
 - (10) Yan wenten sinalih tunggil nyadia naleksek wiadin ngaleklek babaledan saluiring babaledan wiadin wawatesan, luire : babaledan wiadin wates pura, karang pomahan, carik, tegal, setra, tlabah, jlingjing, margi, rurung, papunduk, miwah sane siosan, yogya kapidanda manut pararem;
 - (11) Yan wenten sinalih tunggil ngaletihin, ngarucakin, ngarobedin, ngararabin, palemahan liwaring pomahan paduean nyane, luire : ngutang luhu, bangkaan, miwah saluir ipun, norongang babanon, sajaba toyan sabeh, yogya kapidanda manut pararem;
 - (12) Yan wenten anak tan maagama Hindu ngenahin palemahan sajeroning Desa patut nganutin Awig-Awig miwah pararem desa;
 - (13) Sang sapasira ugi sane pacang ngadol, ngantahang, maselangang, majegang, masewayang, makedihang palemahan tegal, palasan miwah sane siosan sane magenah sajeroning wawidangan desa, ugi mangda polih palugrahan saking Prajuru Desa malarapan Paruman Desa, yen tan polih palugrahan yogya indike punika kawangdeang;
 - (14) Sang sapasira ugi pacang migunayang palemahan tegal, pekarangan, sejaba pacang genah matetanduran, genah pomahan, yogya sangkaning palugrahan Prajuru Desa, siosan ring palugrahan guru wisesa. Yan wenten mamurug sasampun polih kasambat sara antuk desa, sang mamurug kapidanda manut pararem;
 - (15) Yan wenten tan maagama Hindu minabdabin Palemahan tegal desa, wenang utawi patut nganutin Awig-Awig miwah pararem;

Palet 2**Indik Kakayonan****Pawos 36**

- (1) Tan Kalugra nekteb, ngrebah, wit-witan saluir ipun, ring palasan, pategalan, abing, tangkid, miwah genahe siosan, sane kadue antuk krama siosan. Yan wenten mamurug, kapidanda manut pararem;
- (2) Yan wenten wit-witan wiadin kakayonan ngungkulin palemahan anak siosan, sane ngawinang tiyeb, tampias, ngarobedin, asing kungkulan wenang ngatengahang ka desa, Prajuru Desa maritetes saha mituduhang sang madue mangda ngerancap, nekteb, wiadin ngerebah. Yan kantos ping tiga pituduh desane tan kalingu, wenang kapidanda manut pararem;
- (3) Tanem tuwuh utawi tatanduran siosan sajeroning karang pomahan muang Pura Kahyangan, tan kalugra ngalintangin wawangunan. Yan mamurug, wenten raris ngatengahang ka desa, yogya taru punika karebah sajeroning tigang rahina saking pamuput babaose;
- (4) Kakayonan sajeroning karang pomahan ugi mapiara mangda tan ngaletihin, ngarobedin, mamayen karang siosan, saking akah kantos daun ipun. Yan wenten mamurug, tan tulinga ring kakayonan duwe wenten ngatengahang ka desa, Prajuru Desa yogya maritetes, saha nepasin manut panglokika kalih pararem;
- (5) Yan wenten wit taru mentik kantos ageng ring babaledan, wates, saluiring babaledan muang wates, wenten ngatengahang ka desa, patut taru punika karebah, raris pinara tiga, apahtigaan mantuk ka desa, sang madue babaledan apahtigaan soang-soang;
- (6) Yan wenten sinalih tunggil nundungin tanem tuwuh, kakayonan, sane kasuatah pacang mamayen, wenang kabaosang ring sang madue. Yan akas sang madue, yogya katengahang ka desa. Prajuru Desa negdeg, pamutuse manut pararem;
- (7) Yen wenten sinalih tunggal nyadia nandur saluiring tanem tuwuh wiadin kakayonan sane pacang dados ageng, nesek ring babaledan, ring wates, papunduk, ugi mangda masupeksa ring Prajuru Desa, kalih ring panyanding soang-soang, yan tan kalugra tan kapisukayang, pradene taler kapurug, yogya sang mamurug kapidanda manut pararem;
- (8) Sang sapasira ugi nyakap tegal, nandur tatanduran tanem tuwuh sane ngawinang tanahe andog ring tegal sasakapan, ugi mangda makarya pasobhayan ring sang madue tegal inucap. Yan durung pinganan mapikolih tatanduran punika, sadurung mapikolih sator ipun limang pelabuh, sajaba sangkaning kahiangan panyakap raris kajabutin, yogya sang madue tegal nawur panjala sawit-wit, manut pararem;
- (9) Sang sapasira ugi nyakap tegal, tan kawasa ngarebah tatanduran sane dados anggen lakar wawangunan, yan tan polih lugra saking sang madue tegal;

- (10) Yan wenten wit-witan rebah antuk ka panca bhaya tan dados kajarahin antuk sang sapisira ugi, yan wenten mamurug keni pamidanda manut pararem;
- (11) Yan wenten wit-witan kateteb miwah karebah, raris niben wawangunan utawi tatanduran anak sios, prade katengahang ka desa wenang prajuru mamaosin tur niwakang pamutus manut pararem;
- (12) Tan dados marereh-rerehan saluire ring palemahan utawi sasakapan tan due, yan tan kapisukayang, yan wenten mamurug, wenten raris ngatengahang ka desa, keni pamidanda manut pararem.

Palet 3

Indik Wawangunan

Pawos 37

- (1) Sang sapisira ugi krama desa, yan pacang ngawangun panyengker karang pomahan, patut masupeksa ring Panyandinge. Yan tan radin yogya nunas degdegan ring Prajuru Desa. Prajuru Desa negdeg sadu ajeng ring sang mawicara tur ngarerehang pamargi manut pararem;
- (2) Wawangunan ring palemahan carik, tegal, palemahan suwung, sane sampun masanggah pawon tursampun katiwakan pangupakaran karang kabaos karang pomahan. Patut madue rurung betel ka margi agung, sukat margi manut pararem;
- (3) Yan tan masanggah panguluning karang, kabaos akakubon. Tan yogya genah angraksa sawa. Yan wenten mamurug, yogya katiwakan pamidanda mangda mrayascita palemahan punika.
- (4) Sang sapisira ugi pacang ngawangunang wawangunan genah ngalaksanaang upacara Agama luire : Pura, Masjid, Gereja, Wihara, miwah sane siosan, ugi mangda wenten lekita palugrahan Prajuru Desa, kalih lekita palugrahan amawarat. Yan wenten mamurug, kabaos tan sida karya, tan wenang anggen, tur wawangunan punika yogya kawangdeang;
- (5) Wawangunan sajeroning karang pomahan, ugi nganutin Tri Mandhala;
- (6) Tan wenang ngungkulang capcapan wawangunan sajeroning karang pomahan siosan. Yan wenten mamurug, wenten ngatengahang ka desa, yogya Prajuru Desa negdeg, saha nyipat gantungin. Yan jati lintang sajeroning asasih saking puput babaose mangda sampun kapastika;
- (7) Tan wenang nganggen tembok umah wiadin tembok panyengker tan due. Wenang ye kasambat sara antuk sang madue. Yan akas tur mamurug sang kasambat sara, yogya katengahang ka desa, kabaosan antuk Prajuru Desa tur niwakang pamutus manut pararem;
- (8) Sang sapisira ugi pacang mapawangun nepi ring margi agung, nepi ring rurung desa, yogya mangda wenten lekita palugrahan saking Prajuru Desa, wiadin lekita palugrahan Sang Amawarat. Yan tan polih lekita palugrahan, padgatakala wawangunan punika dados katundungan tan ngetang prabea;

- (9) Sang sapisira ugi ngawengku karang pomahan, yogya urati miara kaasrian lebuw pakarangania, rurung pentasan pinih sor asukat karangnia ngalajur;
- (10) Sang sapisira ugi pacang ngawangun hotel miwah sapanunggilan ipun ring wawidangan desa, patut mawaneng manut pararem, saha ugi mangda wenten lekita pasubaya kalih palugrahan saking Prajuru Desa miwah Sang Amawarat.

Palet 4

Indik Wawalungan

Pawos 38

- (1) Sane kinucap wawalungan, inggih punika sakancan buron sane kapiara;
- (2) Sang sapisira ugi krama desa sane miara wawalungan tan wenang ngalumbar;
- (3) Tan wenang ngangonang, negulang wewalungan, ring palemahan tan due, yan tan kapisukaang, sang madue palemahan. Yan akas sang kasambat sara, wawalungan ika wenang taban, Prajuru Desa yogya niwakang pamidanda manut pararem;
- (4) Yan wenten myara wewalungan sajeroning karang pomahan, ugi meratiaksayang kandang ipun, mangda tan ngawetuang bhaya. Yan wenten mamurug, wenang panyandinge nyambatsara. Yan akas sang kasambat sara, wenang katengahang ka desa, Prajuru Desa nepasin tur wenang kapidanda, manut pararem;
- (5) Sang sapisira ugi, ngawangunang kandang wawalungan, buat adol atuku, kandang ayam, itik, miwah sapanunggilan ipun, mangda malekita palugrahan saking Prajuru Desa lan Sang Amawarat;
- (6) Yan wenten wawalungan ngeleb, mamegat ngaranjingin palemahan pura, kahyangan, setra, karang pomahan, miwah sane siosan, yan tan nyadia kalebang tan yogya taban, wenang salabarang ring sang madue, yan nyadia kalebang, wenang taban, tur katengahang ka desa pamutuse manut pararem;
- (7) Sang sapisira ugi tan kalugra nyorongang babanon laleteh kandang wawalungan ka tlabah, jalingjing, sane wenten sajeroning desa yan mamurug kapidanda manut pararem;
- (8) Sang sapisira ugi ngarereh ulam ring tukade, ring telabahe, ring jalingjinge, miwah saungguaning ulam sawawengkon desa, tan wenang nganggen tuba, listrik miwah saluir ipun, ngarusak empelan, miwah tamuku. Yan wenten mamurug wenang kapidanda manut pararem;
- (9) Sang sapisira ugi tan kalugra ngamademang utawi morosin, luire : manuk, bojog, kijang miwah sabacakan ipun, yan tan ngrucakin tatanduran yan wenten mamurug wenang kapidanda manut pararem;
- (10) Sakancan dadosan, sane mungguh ring ajeng, sami mantuk ka desa.

SAT SARGAH
SUKERTA TATA PAWONGAN

Palet 1

Indik Rangkat

Pawos 39

- (1) Indik rangkat punika, manut desa kala patra, muang sima dresta, sane kapatutang tur katinutin antuk krama desa soang-soang, tan singsal ring uger-uger panagara luire :
 - ha. Papadikan;
 - na. Ngarorod;
 - ca. Ngunggahin;
 - ra. Narimen utawi katrimenan.
- (2) Palikrama rangkat kasinangah puput, yan sampun mawidhi widhana pawiwahan, sanistania mabiakawon tur malukat kasaksinin antuk tri upasaksi;
- (3) Yan wenten anak istri karangkatang, yan kantos arahina ring awengi saking matinggale tan wenten pasadok pajati, yogya sang madue wirange nunas kanti ring Prajuru Desa mangda ngamargiang saserepan. Yan sampun sinah genahnia, ngraris ngamargiang panegdeg, saha nunas kanti ring Sang Amawarat;
- (4) Sang sapasira ugi krama desa, yan karauhan Tamiu praya masinutan malarapan antuk ngarorod, ugi mangda masadok miuningang ring Prajuru Desa. Prajuru Desa yogya maritetes, yan sangkaning tan patut pamargin rangkatnia, nguduhang mangda katur ring Sang Amawarat. Yan mamurug, kapidanda manut pararem, tur Tamiu punika katundung saking desa;
- (5) Yan wenten krama desa ngamet anak istri antuk malegandang, mamendet, marikosa, miwah saluir ipun, tan sangkaning sami demen, tan yogya pinuput pawidhi widana pawiwahania sadurung wenten pamutus saking Amawarat;
- (6) Yan wenten saking liwaring desa pacang muput rangkat, sang madue wirang luh yogya nunas pasaksi ring Prajuru Desa mangda wenten ngarauhin, tur anake istri sane marangkat ngarorod patut ngaturang panebas kania ka desa manut pararem;
- (7) Yan wenten krama desa ngarangkatang anak istri sios ring magama Hindu, pawidhi widana pawiwahannia patut kalaksanaang sasampun anak istri punika masudi wadani.

Ngarug Sesana

Pawos 40

- (1) Yan wenten anak lanang mobotin anak istri sane sami-sami durung madue rabi, tur sabda kapariangken, yan katur bebaose ka desa, Prajuru Desa patut ngutsahaang sang kalih mangda majangkepan alaki rabi, tur mawidhi widhana pawiwahan kadi patute;
- (2) Yan wenten krama desa mobotin anak istri, salah sinunggal sampun madue rabi, pada sampun madue rabi, wirangnia patut ngaturang wicara punika ring Prajuru Desa, yan tan puput babaose, yogya kaaturang ring Sang Amawarat.

Palet 2

Indik Belas Makurenan utawi Nyapian

Pawos 41

- (1) Sane kabaos nyapian inggih punika sang palas marabian, sane sampun katiwakan pamutus antuk Sang Amawarat minakadi sampun kakerabang ring Paruman Desa;
- (2) Krama desa sane palas marabian, sasampun polih pamutus saking Sang Amawarat patut masadok miuningang ring Prajuru Desa, sakasep ipun asasih saking palase;
- (3) Yan wenten krama desa ngarangkatang sapian, sadurung tigang sasih utawi 105 (satus lima) dina saking dina palase, yogya sang ngarangkatang sapian punika keni danda pakerang manut pararem;
- (4) Yan wenten anak istri wit saking desa, nyapian mawali ka desa, yogya sang madue wirange mrayascitta marisudha anak istri punika maupasaksi Prajuru Desa.

Palet 3

Indik Balu

Pawos 42

- (1) Sane kabaos balu, anak istri utawi anak lanang sane katinggal seda antuk rabine, wiadin anak lanang katinggal nyapian taler kawastanin balu;
- (2) Yan wenten krama desa lanang wiadin istri balu, ngawengku karang pomahan, yogya mayahan asele;
- (3) Yan wenten balu lanang ngawengku karang, madue santana istri sampun antes mayahan, yogya mayahan bulangkep;
- (4) Yan wenten balu istri, madue Santana lanang sampun antes mayahan, yogya mayahan bulangkep;
- (5) Yan wenten anak istri balu, marangkat yogya rangkat punika kapuputang manut dresta. Yan babalon punika kantun pageh kapuputang antuk wirang lakine riin, lan kaupasaksi Prajuru Desa;

- (6) Mungguing wawanengan babalon istri utawi rangda, ring indik wawarisan, minakadi sane siosan, nganutin uger-uger sane karajegang antuk Sang Amawarat.

Palet 4

Indik Santana

Pawos 43

- (1) Krama desa ngarajegang santana ka purusa saking sidhikara tunggal lan paperasan manut dresta;
- (2) Sapasira ugi krama desa meras santana, nuduk mantu, makedihang utawi nyerahang raga, yogya sangkaning radin, maduluran upacara widhi widana, kasaksinin Prajuru Desa, saha polih lekita pamikukuh saking amawarat, kasiarang ring desa;

Palet 5

Indik Wawarisan

Pawos 44

- (1) Sane wenang kawarisin, luire :
- ha. Among-amongan ring desa, ayah-ayahan saurah-arih;
 - na. Utang-piutang sang kawarisin;
 - ca. Saraja due, bhrana, tegal, carik, tatamian, sakancan kasugihan.
- (2) Sane wenang ngawarisin :
- ha. Manut lalintih papernahan adoh tampek saking purusa tunggal sidhikara, tunggal Dadia;
 - na. Putra dadaman wiadin putra paperasan;
 - ca. Santana saking nuduk mantu;
 - ra. Sangkaning polih pitemes saking sang kawarisin sang madue saluir sane dados kawarisang, saking palugrahan Amawarat, pinih akeh apahtigaan saking paduean nyane maka pioli-oli pagunakayan;
- (3) Sapasira ugi Krama Desa, yan tilar saking agama Hindu, tan yogya ngawaris sane kamulan patut kawarisin;
- (4) Ngedum wawarisan, kapatut pinih sor sasampun puput maabenang kalih ngalinggihang pitara sang ngawarisang. Sane dados dum, sajaba mangge padagingan pangaci-aci, minakadi saluiring sane mangge piranti ngalaksanaang upacara agama, pustaka-pustaka sane kapingitang saluir ipun.

SAPTAMAS SARGAH
WICARA LAN PAMIDANDA

Palet 1

Indik Wicara

Pawos 45

- (1) Saluiring wicara Adat, ring wawidangan Desa, wenang rinaosan olih Prajuru Desa. Yan tan kasidan puput katur ring Sang Amawarat;
- (2) Yan wenten wicara indik Adat ring Banjar, minakadi sekaa-sekaa siosan, yogya kabaosin antuk prajurunia soang-soang, yan tan kasidan puput, wenang katengahang ka desa, Prajuru Desa yogya mamaosin;
- (3) Yan sang mawicara taler tan tinut ring pamutus wicara sane katiwakang inucap ring ajeng, prasida sang mawicara tan kalugra polih patulung saking desa utawi kasepekang kantos puput wicarannia.

Palet 2

Indik Pamidanda

Pawos 46

- (1) Pamidanda sane wenang katiwakang antuk Prajuru Desa, Banjar, sekaa-sekaa sawawengkon desa, sakadi ring sor puniki :
 - ha. Danda artha;
 - na. Danda ayah-ayahan;
 - ca. Upasaksi, dewa saksi, pangrarata, sumpah;
 - ra. Danda panyangaskara, luire; mrayascita, marisudha, miwah saluir ipun;
 - ka. Kasepekang, kaheladang;
 - da. Pamidanda siosan manut palugrahan Sang Amawarat.
2. Patiwak pamidanda, manut ungguan wicarane soang-soang, minakadi werat ringan wicara inucap, luire :
 - ha. Yan wicara ring desa, yogya kapidanda antuk desa. Mungguing dadandan ngaranjing ka desa;
 - na. Yan wicara ring Banjar, sekaa-sekaa, yogya kapidanda ring banjar utawi sekaa-sekaa siosan, dadandan ngaranjing ka soang-soang.
3. Agung alit dadandan, manut panglokikan agung alit werat ringan kasisipane sane mungguh ring Awig-Awig, gagaduhan soang-soang, manut pamutus paruman.

ASTAMA SARGAH
NGUWAH-NGUWUHIN AWIG-AWIG

Pawos 47

- (1) Sane wenang nguwah-nguwuhin inggih punika, pasukertan, pasuara, pamutus parareman, wiadin pamutus paruman miwah sane siosan sapanunggilania;
- (2) Indik nguwah-nguwuhin pasukertan, pasuara, wiadin pamutus parareman wiadin pamutus paruman miwah sane siosan, manut tata kramaning paruman;

NAWAMAS SARGAH


PAMUPUT


Pawos 48


- (1) Awig-Awig puniki mawasta Awig-Awig Desa Adat Jumenang;
- (2) Awig-Awig puniki pinaka bantang sahananing Awig-Awig, Pasuara, Pasukertan, miwah saluiripun, sane maangge ring Pura Kahyangan, Banjar, Subak, Sekaa-sekaa sane wenten sajeroning Desa Adat Jumenang;
- (3) Pura Kahyangan, Banjar, Sekaa-sekaa sane wenten sajeroning Desa Adat Jumenang, wenang ngawangunang Awig-Awig, pasukertan, pasuara, gagaduhan soang-soang, nanging dagingipun tan dados singsal utawi tungkas ring Awig-Awig Desa Adat Jumenang;
- (4) Saluiring sane durung munggah utawi kinucap ring Awig-Awig puniki, kaunggahang sajeroning pararem, pamutus Paruman Desa Adat Jumenang;
- (5) Dresta kuna sane kari dados angge, yan tan tungkas ring daging Awig-Awig Desa Adat Jumenang, manut kojaring sastra Agama Hindu, anut ring uger-uger nagara, saha kaputusan sajeroning sangkepan miwah Paruman Desa Adat Jumenang;
- (6) Awig-Awig Desa Adat Jumenang, puniki kawangun antuk Krama Desa Adat Jumenang, kapastika manut Upacara Agama Hindu, kaladina;
Uku,
tanggal/panglong ping,
rah,
tenggek,
Isaka,
magenah ring,
kapuput antuk Ida Sulinggih
- (7) Awig-Awig puniki kalingga tanganin antuk Prajuru Desa, luire : Bandesa, Pemadhen Desa, Penyarikan, Juru Raksa, saha kasarengin Keliyang Banjar tur kasaksinin antuk Keliyang Banjar Dinas Jumenang, Perbekel Bukit, Camat Karangasem, kakukuhang antuk
- (8) Awig-Awig puniki kalaksanaang ngawit dina :
kantos salanturipun;


(9) Luwir sang ngalingga tanganin :

ha. Kapratama : Prajuru Desa Adat Jumenang :

PRAJURU DESA
Bandesa Adat Jumenang,

I Wayan Sulendra Yasa

Pemadhen Bandesa,

I Wayan Sudana, SH., MAP

Panyarikan,

I Nyoman Santi Martoni

Juru Raksa,

I Ketut Subandria

Pangarah,

I Ketut Sentosa

na.

Keliyang Banjar Adat Jumenang,

I Nyoman Sukayasa




ca. Maka Saksi :

1) Keliyang Banjar Dinas Jumenang,




I Ketut Sentosa

2) Perbekel Desa Bukit.



I Wayan Sudana, SH.,MAP

3) Camat Karangasem,



Cokorda Alit Surya Prabawa S.STP

Pembina

NIP. 19771121 199612 1 002